




臣朱壽朋敬編

臣沈彭年恭校

十一月丁卯朔諭各國訂約以來齟齬通問歲時不絕和好之誼歷久彌敦駐京各國使臣均能講信修睦聯絡邦交深堪嘉尚上年正二月間迭逢慶典欽奉 懿旨命總理各國事務衙門設宴款待寰海聯情洵稱盛舉茲朕親裁大政已閱二年在京各國使臣誼應覲見允宜仿照同治十二年成案並增定歲見之期以昭優禮所有各國駐京實任署任各使臣著於明年正月由總理各國事務衙門奏請定期朝見卽於次日在該衙門設宴款待嗣後每逢正月均照此舉行續到使臣按年覲見至國有大慶中外臚歡並著該衙門屆時奏請筵宴用示朝廷修好睦鄰有加無已至意所有應行禮節著該衙門先期具奏

○戊辰大學士潘祖蔭卒賜卹如例○以宛朐爲廣東瓊州鎮總兵○己巳以祁世長爲工部尙書孫家鼐爲左都御史○辛未以徐郅爲吏部右侍郎廖壽恆爲禮部左侍郎錢應溥爲禮部右侍郎○李鴻章奏前於光緒七年十月驗收礮快船摺內奏明奉天金州旅順口形勢實居北洋險要局廠船塢各項當陸續籌款興造九年二月附片具陳籌辦旅順各工大概範圍聲明該處工程開山濬海工大費鉅仿照

西法多與洋人交涉絕無例案可循實難豫爲估定嗣於十四年十二月附片陳明旅順船塢工程交法國人德威尼承攬包做派按察使周馥候補道劉含芳督同妥辦並添築攔潮石壩暨籌撥工款數目均經蒙 恩允准在案本年秋間據報全工告竣當經遴派北洋海軍提督丁汝昌直隸按察使周馥津海關道劉汝翼會同前往逐細認真驗收茲據詳稱該提督等於九月二十三日齊抵旅順包工之德威尼因事回國有德威尼自覓監工洋人吉禮豐在工次開具洋文做工清單送由督辦旅順船塢工程候補道劉含芳譯成華文該提督等會同照單逐細量驗查大石船塢長四十一丈三尺寬十二丈四尺深三丈七尺九寸八分石階鐵梯滑道俱全隔口以鐵船橫攔爲門現在門水吸乾平遠兵船已入塢修理全塢石工俱用山東大塊方石墜以西洋塞門德土凝結無縫平整堅實堪爲油修鐵甲戰艦之用又查塢外停艦大石澳東南北三面共長四百一十丈六尺八寸西面攔潮大石壩長九十三丈四尺形如方池渟泓蕩漾潮水落盡水深尙有二丈四尺西北留一口門以便兵船出入四週全砌寬大石岸由岸面平地量至澳底深三丈八尺二寸週岸泊船毫無風浪搖動凡船入塢油底之後即可出塢靠岸鑲配修整做工極爲便利先是西面攔潮壩下歷年積淤有深至八九丈者各國洋監工往視均稱難以著手該洋人築造岸基時先砌鐵石圍牆下壓而於圍牆中空之處用繩汲取淤泥迫牆漸砌漸鑿淤泥漸取漸出

露見堅結老土然後層築灰石上復接砌圈洞再上始砌石岸此澳岸三丈八尺以下之工做工之難做法之巧實所創見洋師經營之苦勞費之鉅亦以此段工程爲最又澳邊修船各廠九座佔地四萬八千五百方尺計鍋爐廠機器廠吸水鍋爐廠吸水機器廠木作廠銅匠廠鑄鐵廠打鐵廠電燈廠又澳之南岸建大庫四座臨東建大庫一座每座佔地四千八百七十八方尺備儲船械雜料以上廠庫各工概用鐵樑鐵瓦以避風雪而防火燭高寬堅固較瓦房更爲合用又澳隅之四週聯以鐵道九百七丈間段設大小起重鐵架五座專起重大物件以濟人力之所不及又澳隅與各廠庫碼頭等處置大小電燈四十六座以便趨工夜做之用又慮近海鹹水之不便食用也遠引山泉十餘里束以鐵管埋入地中穿溪越隴屈曲而達於澳隅之四旁使水陸將士機廠工匠便於朝夕取用不致因飲水不潔易生疫病又慮臨海遠灘之不便起卸也建丁字式大鐵碼頭一座使往來兵艦上煤運械不致停滯遇事赴機迅速其餘如修小輪船之小石陽藏舢板之鐵棚繫船浮標鐵樁以及各廠內一應修船機器均一一設置完備以上各項均與代德威尼監工之洋人吉禮豐開送洋文做工清單相符此次該提督等驗收德威尼包辦工程係於本年九月二十七日卽西歷一千八百九十年十一月初九日收工完竣自是日起限一年查照原議由代德威尼擔保之外國銀行照料一年限滿再行保固十年均與包工監工各洋人交代明白

此項工程原估銀一百二十五萬兩開辦之始由北洋經費內撥過銀七萬八千零八十兩仍需銀一百十七萬一千九百二十兩添做攔潮石壩等工須添籌銀十四萬三千五百兩二共需銀一百三十一萬五千四百二十兩奏准由直隸海防展捐項下撥銀六十三萬一千四百三十二兩八錢九分又由部庫及鄭工捐內撥銀五十三萬九千四百九十七兩一錢二分又撥給購買四快船餘銀六萬九千八百二十五兩九錢一分零又由北洋經費內續撥銀七萬四千六百六十四兩七分零以上先後共撥給銀一百三十九萬三千五百兩統作旅順陽澳廠庫各項工程之用內德威尼承辦鳴澳石泊岸等工用銀一百十五萬兩又添做攔潮石壩自來水管鐵棚涵洞小石船塢等工用銀二十萬八百五十兩又添購機器用銀四萬二千六百五十兩出入兩抵儘數開銷業經旅順工程局將歷次請領銀數與海防支應局逐款核對均屬相符應由海防支應局將收放此項工程各銀數開單詳請咨送海軍衙門戶部查核至所做各工均係洋人包辦前經臣奏明與內地做法迥異無例可循准工部咨覆有案應由旅順工員另開工程丈尺做法機器名色件數清單詳請分咨海軍衙門工部存案並據繪具船塢船澳廠庫各工圖說前來臣查旅順海口居秦直東三省洋面之間口內山圍沙互東西兩澳可泊兵船多隻三省海面設有戰事策應均極便捷洵為北洋緊要門戶既有大枝海軍駐紮船塢一項實係必不可緩之工自奏明

籌辦以來已及十年祇因鉅款難集工程浩大其間又值海防有事未能一氣呵成幸賴海軍衙門暨戶部顧全大局撥款應手俾要工得以速成旅順口濱臨大洋怒潮衝激風浪洶湧水底施工極難縋繫聞在外洋經營水師海口鴨澳各工需費動輒千百萬金與內江內河工程迥異德威尼全仿西法製造亦復幾經改作始底於成今據驗收各工均屬相符一年限內由代德威尼擔保之外國銀行照料並具保固以十年爲限嗣後北洋海軍戰艦遇有損壞均可就近入鴨修理無庸借助日本香港諸石碼洵爲緩急可恃並無須糜費巨資從此量力籌畫逐漸擴充將見北洋海軍規模足以雄視一切渤海門戶深固不搖其裨益於海防大局誠非淺鮮此項工程屢與洋匠包辦全用洋法並無例案可循請免造冊報銷得旨該衙門知道○癸酉唐炯奏巧家威甯兩銅廠礦脈如常其餘各廠都陸續見效但入山不深礦脈尙微現嚴督趕辦十起頭批年內足可繳齊威甯鉛廠獲礦雖多成分尙薄於七月開鑪煎出鉛斤已陸續交貴州採辦京鉛委員鄧良成收解其礦山鉛廠已起解五十萬斤倘貴州工本發足年內尙可辦得數十萬斤下戶部知之○戶部左侍郎孫詒經卒賜卹如例○甲戌卞寶第奏前奉戶部奏定外省報銷新章第十四條內載各省設立機器局並閩省船政局如有添購機器經費若干事前奏明咨行立案事後方准核銷等因茲據廠員稟稱輪機廠汽機經用日久機括鬆蝕運動不靈應添製十五匹馬力汽

機一副以備抽換工料共銀一千四百餘兩又輪機水缸兩廠製造銅鐵小機件藉欲節省汽力輪機廠添製旋鐵小輪牀三副工料共銀一千五百餘兩水缸廠添製挂壁小鑽機二架工料共銀一百兩又船槽機器屋宇自光緒十年間大修之後歷用將及五年該槽爲任事之區日久不無鬆朽用特興修以昭慎重工料共銀二千一百餘兩又工次船臺歷時已久木質亦有朽蝕凡起製新船均應先行驗明其應修者卽與興修始堪任重計修第三號官甲艦船臺工料銀七百餘兩又建造馬限中坡後坡護廠礮臺兩座經前大臣裴蔭森將建造緣由於光緒十三年三月間奏明在案工程現已告竣計中坡礮臺工料共銀八千七百餘兩後坡礮臺工料共銀一萬七百餘兩以上各款均應歸於光緒十五年分製船經費項下造銷等語呈請立案前來臣覆查無異除咨部查照並彙案造銷外謹恭摺具陳下部知之○乙亥以榮惠爲內閣學士○丙子李鴻章奏察哈爾都統管理口外臺站牧羣地廣任重原定廉俸等項本屬無多又經折扣歲入不及千金不敷辦公之用歷任皆不能延致幕友卽緊要案牘多委之左右司員遂致百弊叢積兼以轄境過廣須巡閱蒙古各旗稽考牧羣軍政輒因經費無出恐滋擾累積弊已久不易挽回其賢者僅守成法而不能有爲不肖者至漁陋規而莫解自潔牧政之壞至今日而極屢經言者參劾疊奉諭旨按治直隸與察哈爾接壤過有宣化將吏來見臣隨時詢問知之頗詳去歲前後查覆之

案亦經條陳上聞 聖明博採羣言深知積弊 特擢湖北撫臣奎斌爲都統奎斌歷任封圻廉公自矢

勵節耐苦斷不肯以賠累爲言惟立法須經久可行中材能守際此得人整頓當使後來永遠遵循伏念

近年 朝廷整飭東三省軍事吏事奉天將軍府尹諸臣既增養廉復加公費爲數甚優吉林將軍琿春

副都統等亦皆酌加公費臣於光緒五年以順天府尹養廉過少奏請歲撥天津釐金三千兩以資辦公

並經奉 旨允行有案蓋 聖朝體念臣工須令措置裕如乃可責其奉公剔弊若使遇事竭蹶則一切

要務皆難措手縱臣下尙知自愛而因循率舉所失實多察哈爾都統經管臺站總理牧政綏輯蒙古寄

任重要而廉俸微薄用款不敷現當積弊之後剔釐方新亟應酌加津貼俾辦公有資得以實力整頓惟

部款既難籲請司庫亦無可籌查有該處茶馬釐捐一項除奏定常年應放各款外尙有盈餘遇有要差

向准專案奏撥擬請在此款內每年勻提實銀三千六百兩以三千兩撥歸都統衙門作爲加增公費副

都統職司較簡亦擬酌加六百兩以示體恤於放款不致短絀於公事實有裨益且與順天府尹奏加公

費成案相符如蒙 恩准再由臣咨行察哈爾都統查照下戶部議奏○丁丑大祀 天於 圖丘 上

親詣行禮○剛毅奏吳淞江爲江浙諸水入海之咽喉歲久失濬積淤日厚去秋霪潦成災下流洩水不

暢以致倒輪倒灌一片汪洋臣考諸輿圖詢諸衆論竊稱由於吳淞江迄未開濬之故前於挑挖蘊藻河

時聲明欲濬吳淞江必先濬蘊藻河支港一律疏通然後幹河可以大舉修治業經恭摺具奏在案現當冬令水涸之時農隙務閒晚稻均已收割正宜及時興工以收江浙兩省之水利經臣札委候補知府周運會同沿河地方官吏招集民夫分段挑濬並先經臣函商兩江督臣曾國荃札調蘇松鎮總兵張景春狼山鎮總兵曹德慶管帶督標親兵忠字營記名提督劉久有統帶督標親兵中營浙江候補道朱式雲記名提督蕭鎮江等分帶所部防營兵勇來工協挑又經臣派撥管帶撫標正前水陸等營記名總兵龍殿揚兼統中軍左營參將常福兼統正後營城守營參將會統衛副前營補用副將徐文慶等分率所部先後到工定於十八日各歸各段一律開挑值此天氣放晴一切工程自能速成設遇陰雨時作或不免多延月日此臣所深慮者也查吳淞江工程袤延有七十餘里之長此番招募民夫調撥勇丁不下萬餘人雖民工勇工各分段落不使犬牙相錯致起紛爭猶恐查察稍有未周該印委及營官等未足以資彈壓擬由臣隨時輕裝減從親往工次督率指撥鎮懾一切合併聲明報聞○戊寅廖壽豐奏光緒十五年十一月河內縣王賀莊沁河漫口合龍前撫臣倪文蔚請將在工出力人員援照前年武陟縣小楊莊成案擇尤酌保數員奉到 硃批著准其擇尤酌保數員毋許冒濫欽此欽遵於本年二月二十七日擬定請獎文職二十員開單具奏奉 硃批該部議奏單併發欽此嗣准吏部咨明沁河合龍出力人員請援

照武陟小楊莊成案請獎既未欽奉 特旨允准仍應按尋常勞績核議且前奉 諭旨准其酌保數員

今請獎至二十員之多未免浮濫應令將所保員額核實刪減到部再行核議光緒十六年四月十四日具奏奉 旨依議欽此等因咨行前來前撫臣未及核辦接管到臣伏查河內武陟兩縣所管沁河一切

工程均與黃河相埒是以漫口則地方官得有處分合龍則出力人員得請優獎勸懲一秉至公所有河內縣王賀莊堵築沁堤一案時值秋雨連旬各該員分掌兩壩各廠籌防修守並派赴各路採購料物風雨載道泥深沒踝自興工以至合龍備歷艱辛是與武陟小楊莊之役事同一律可否仰懇 天恩仍准援照小楊莊成案核獎之處出自逾格 鴻慈至原請擬獎二十員臣逐細訪查悉心考核遵即切實刪

減裁去五員僅存十五員另繕清單籲懇 恩施以昭激勸下吏部議奏○富勒銘額奏伊犁滿營官兵

自兵燹後死亡相繼男婦丁口僅存一千三百有奇光緒八年原任將軍金順奏請由錫伯營挑選壯丁

三千二百名作為新滿洲以補惠遠城滿營四千之額光緒十四年前將軍色楞額會奏擬請減為三千

五百四員名嗣經部議核駁伊犁滿營光緒十三年據錫綸奏報僅存男婦一千三百有奇今該將軍請

設官兵二千五百四員名計丁口三萬四千一百餘名是所設官兵浮於所存男婦之數幾十倍實未便

率准支給俸餉等因伏查伊犁舊滿營現存丁口一千三百餘名金順奏請挑撥錫伯新滿營九千五百

餘名合計新舊滿營丁口一萬有奇並無三萬四千一百餘名之多今部臣既經議駁自應遵照辦理惟

滿營丁口僅存一千三百餘名十六年正月起又陸續收回丁口三百餘名以惠遠一城准定兵額一千

名不特勢顯空虛卽操防巡邊坐卡差遣等事已實難於分布勉強敷衍設有貽誤咎將誰歸雖撫臣劉

錦棠會議奏請安設軍標馬步一千名除填紮防邊而外無餘兼顧前將軍色楞額曾與奴才籌商滿營

官兵擬設二千於舊滿營人數內挑足一千名仍挑留錫伯新滿洲一千員名共二千名以資捍衛未及

具奏因病出缺奴才渥荷 聖恩護理斯篆斷不敢畏難緘默稍涉因循現擬先將旗營力求整頓以期

漸復舊制而滿營甚覺兵單萬難分布再四思維惟有籲懇 天恩准照色楞額原議滿營定爲二千兵

額仍挑留錫伯新滿洲一千員名以備不足實於邊防大有裨益所需俸餉樽節勻放總不逾四十萬餉

之數如蒙 俞允再將官兵銜名暨餉章等項造冊咨部查核其餘未盡事宜容俟查明再行具奏下部

議奏○以廖壽恆爲戶部左侍郎錢應溥爲禮部左侍郎李文田爲禮部右侍郎○己卯怡親王載敦薨

賞銀一千兩治喪○辛巳 麗皇貴太妃薨○壬午諭本月十五日 麗皇貴太妃薨逝十八日朕親詣

奠酒行禮大內以下宗室以上並王公文武官員著於是日素服一日○李鴻章奏准軍收支款項業經

截至光緒十四年十二月底止列爲第十七案報銷於光緒十五年十二月初三日具奏奉 硃批該部

議奏單併發欽此並經造冊送部接准部覆按冊核銷在案伏查淮軍分駐直隸沿海各口要區並奉天之旅順口大連灣等處計武衛親兵武毅仁盛銘楚護軍親慶馬步水師共五十一營連同水陸各哨棚併護運餉械弁勇統歸淮軍案內造冊彙總請銷今自光緒十五年正月起截至是年十月底止列爲第十八案所有統領營哨官弁員名勇夫開收總數駐防處所先經造冊分咨軍機處暨戶兵工部備查又將支給正雜欸項增裁數目遵照新章每三箇月開報一次咨送各部查核其淮軍馬步水師各營並隨營辦事支應等差文武官弁親兵勇夫薪費口糧倒補馬匹柴薪車價駝騾餵養卹賞水陸轉運價腳夫工採辦製造用欸油艚船隻經費正雜各項均循前案楚軍營制與奏定章程歷屆准銷例案分別截清起止概按湘平折寶庫平接續造報飭據淮軍報銷局司道逐欸清釐查核計舊管銀九十三萬三千一百七十八兩五錢有奇新收銀二百十二萬六千一百二十五兩一錢有奇登除及附銷銀四十五萬一千九百七十三兩一錢有奇開除正雜等項遵照部議酌定軍需報銷章程各歸各部核銷計應歸戶部核銷銀一百八十三萬五千二兩六錢有奇應歸兵部核銷銀三萬九百四十九兩七錢有奇應歸工部核銷銀八萬五千三百七錢有奇統共請銷銀一百九十四萬六千六兩一錢有奇應截存銀六十六萬一千三百二十四兩三錢有奇已接支光緒十六年正月以後淮軍馬步水師營哨正雜餉項並購製中

外軍火器械工價預儲軍米等項動放無存歸於後案舊管項下滾接造報等情具詳請奏前來臣查淮軍各營分駐直隸天津大沽北塘蘆臺至山海關沿海一帶並奉天之旅順大連灣各海口修築新式礮臺擇要扼守仿照西洋兵法練習後膛礮水雷魚雷各用法講求制勝機宜俾聲威既張敵情自懾實爲消患無形之計海疆千餘里逐漸布置內衛京畿門戶外控藩屬鄰邦有事得資應援尙稱緩急可恃餉項乃計口授食之需關繫至重歷屆報銷案內截存銀兩皆係設法節縮並將月餉酌量緩欠誠以近畿海防關繫重大無時敢忘戰備不得不稍留餘地藉應急需現計欠餉至一百六十一萬六千九百九十兩有奇若將截存銀兩儘數抵補不敷甚巨況次年各軍食米須先期發價赴南省購運方免臨時缺誤此項米價向在截存項下酌撥近因各省關額解准餉逐漸短少往往入不敷出竭蹶情形日甚日本屆新收銀款較上屆計少至三十萬兩之多遂至截存銀兩動放無存惟有隨時諄催各省關實力籌解冀免遇事束手所有造報十五年正雜款項均係循照歷屆准銷成案撙節支發實用實銷並無絲毫浮冒得旨該衙門知道○岐元劉秉璋奏本年春間雷波廳屬小溝補卽夷支風簸漁姑等甸結西昌縣生番二千餘人滋擾邊境焚場劫財擄人經臣等調派各營前往迭於牛喫水蓮花石等處接仗擊退會將獲勝緣由奏陳在案七月二十七日大浣子員扎黑夷普子糾夷五百餘人竄出海瑞壩徐家崖一帶

經哨官趙孟謙都司吳以忠合攻轟斃夷匪四十餘名趙孟謙奮勇直前將夷普子生擒過陣餘衆奔潰統領達宇營馬朝選卽於次日率弁分路由徐家崖進剿曹家堰轟斃夷匪百餘名長勝右營弁勇擒獲白夷數名各奪獲刀矛氈衫百餘件並燬蠻棚七十餘間各營日出搜山夜守要隘該夷潛侵暗擾均經營勇擒斬多名隨時擊退馬朝選探得夷匪集有二千餘衆盤踞距三陵岡三十里之田家灣因密與各營將備商定調守備戴炳勳千總徐鉞所部營勇並參將謝金詰之鄉導勇二百名及先鋒營劉玉田合爲一隊進攻田家灣調雷波廳施毓齡帶勇一百名團練二百名爲一隊進攻田家灣左路該統領自派管帶唐珊峯並衛隊及中哨隊伍爲一隊進攻田家灣右路復派長勝右營姚振邦安阜營吳以忠先期潛赴三複岡於九月初七日夜陸續會齊三路同時並進夷匪驚覺大股出敵我軍各用洋鎗連環圍打一面放火先將寨外蠻棚焚燬鄉導先鋒等營先進各營相繼而進接戰良久夷衆抵敵不住四散奔逃墜巖落澗者無算乘勝將田家灣寨家梁子夷巢數百間悉行焚燬天曙追殺十餘里轟斃夷匪百餘名斬首二十餘顆生擒黑白夷三十餘名是役也我軍帶傷亦二十餘名當卽照章分別輕重給賞隨密探該敗夷散踞慈子坪雙土地白巖灣等處夷巢馬朝選與各營將備商定進攻於初九夜仍分三隊謝金詰劉玉田督勇銜枚疾走至老街子解衣渡河直上該坪陣斬十餘名生擒督隊夷酋百戶達曲一

名黑白夷二十餘名施毓齡等進攻雙土地姚振邦等進攻白巖灣同時撲擊各有斬獲盡斃逆夷無算
餘衆退敗三路弁勇會齊於初十日午後收隊沿途共燬夷巢千餘間夷卡三十餘座各營獻俘獻馘當
經該統領分別記賞一面將擒獲百戶達曲等斬馘叛夷退入母豬坡監守劉玉田探得有黑夷慈鳴者
爲此次號召夷匪指揮出擾之人遂與謝金語密派熟識慈鳴之鄉導勇於十五日夜潛赴該坡夷匪偵
知山頂擂石如雨而下待至四更擂石不繼我軍突上山寨火彈齊發火光中鄉導勇羅廷奎瞥見逆首
慈鳴倉皇衝突鏖戰兩時傷其左腿始就擒獲夷衆又復散敗我軍振旅而還臣等因其先後告捷檄令
各營仍前嚴密防範相機進剿俾該夷勢窮力竭自必傾心歸誠得 旨著俟事定後擇尤保獎毋許冒
濫○乙酉 上幸醇親王邸第視疾○丁亥醇親王奕譞薨○諭朕欽奉 慈禧端佑康頤昭豫莊誠壽
恭欽獻皇太后懿旨皇帝本生父醇親王奕譞秉性忠純宅心仁厚才猷遠大勲業崇閎自幼仰蒙 宣
宗成皇帝鍾愛恩眷優加 文宗顯皇帝誼篤友于封爲郡王同治年間晉封親王歷充御前大臣等差
恪恭盡職迨皇帝入承大統特降懿旨令以親王世襲罔替慰諭再三涕泣受命歷年以來平章軍國重
事主持正議利國利民其總理神機營及創立北洋海軍宏謨碩畫成效昭然前年親赴海口巡閱操防
尤能綜攬大綱不辭勞瘁論國家酬庸之典雖疊頒異數猶覺功浮於賞而王謙謹爲懷益加寅畏於特

旨賞坐杏黃轎始終不敢乘坐並以現居 賜邸爲皇帝發祥之所敬援 雍和宮成憲請旨恭繳其忠
敬篤乘之忱數十年如一日自古賢王罕有倫比王氣體素強前歲感犯肝疾特率同皇帝屢往問視旋
卽調治就痊本年夏間感受暑溼觸發舊疾復同皇帝迭次詣邸看視近日以來聞王病篤深宮默念日
夕焦然不料病勢已深醫藥罔效遽於二十一日丑刻薨逝深宮震悼實深著賞給陀羅經被卽日親臨
賜奠皇帝詣邸成服行禮派總管內務府大臣福錕禮部尙書崑岡工部尙書熙敬禮部左侍郎錢應溥
辦理喪事所有一切事宜俱由官爲經理鎮國公載灃卽日承襲王爵用示篤念親賢至意○諭朕欽奉
慈禧端佑康頤昭豫莊誠壽恭欽獻皇太后懿旨自古帝王以孝治天下必推本於所生而禮有經權
尤必折衷至當方足以昭示來茲恭讀 高宗純皇帝御製濮議辨援引禮經垂爲定論稱所生曰皇帝
本生父歿則稱本生考立廟於其邸第爲不祧之廟祀以天子之禮合乎父爲士子爲大夫葬以士祭以
大夫之義則尊親之誼交盡而於公義私恩兩無遺憾 聖訓煌煌昭垂萬世洵協於天理人情之至皇
帝入嗣 文宗顯皇帝誕承大統光緒元年正月醇親王奕譞密陳豫杜妄論一疏內稱歷代繼統之君
推崇本生父母者以宋孝宗不改子偁秀王之封爲至當將來如有以治平嘉靖之說進者務目之爲奸
邪小人立加屏斥等語持論正大光明敬徵 高宗純皇帝御論正相昭合其志慮之忠誠防維之深切

方之古純臣何以加茲上年二月初二日因吳大澂之奏特降懿旨將王之密疏宣示中外俾天下臣民咸知我朝隆軌超軼前代而醇親王寅畏之本心從此昭然若揭詎意天不假年溘然長逝痛惜之極悲感彌深醇親王著定稱號曰皇帝本生考所有一切飾終葬祭典禮自宜恪遵 祖訓詳定彝章用遂皇帝恩義交盡之忱兼表賢王終始不渝之志著派御前大臣軍機大臣翁同龢孫家鼐會同禮部妥議以聞○戊子劉秉璋奏查川江險灘櫛比不可枚舉其最奇險者爲三峽夔峽起奉節至鹽山爲三峽之首卽古瞿塘峽當峽口者曰豐瀨堆冬則出水二十餘丈夏則沒入水中水高漲亦二三十丈勢險溜急人力難施巫峽在巫山縣東水經註云是杜宇開鑿以通江水沿峽一百六十里峯巒峭削所謂巫山十二峯也在湖北宜昌歸州境者曰巴峽卽古之西陵峽凡此三峽峭壁插天懸崖千仞並無山徑可通蜀道之難於斯爲最中惟一綫川江急湍奔流上下行船絕無繚路每當夏季水漲舟行輒覆溺斃者不下數百十人光緒十四年九月間夔州府汪鑑立志捐廉稟請開修經 臣批准先從夔峽開工自白帝城起下至大溪對面之狀元堆止曲折紆迴約三十里施工之始工匠無所憑藉乃對壁鑿孔層累而上每開一大竇竇以火藥燃引綫而炸之旋炸旋鑿使千仞峭壁之腰嵌成五六尺寬平坦路絆輻可以並行其中分造溝澗平橋十九道自狀元堆至巫山縣城九十里中造平橋二道拱橋四道並創開土石山麓亦成